



Universitätsbibliothek Paderborn

**Disputationes|| ROBERTI BELLAR-||MINI E SOCIETATE
IESV,|| DE CONTROVERSIIS CHRISTIANAE|| FIDEI,
ADVERSVS HVIVS TEM-||poris Hæreticos,||**

Tribus Tomis comprehensæ.||

De Baptismo Et Confirmatione - Dvobus Libris Explicata

Bellarmino, Roberto Francesco Romolo <Heiliger>

Ingolstadii, [1599]

VD16 B 1607

III. De forma Baptismi.

[urn:nbn:de:hbz:466:1-53934](https://nbn-resolving.de/urn:nbn:de:hbz:466:1-53934)

nymus docet in cap. 3. Matthæi, & Beda in cap. 3. Lucæ, vel etiam ignem diuini iudicij, ut exponit Hilarius canone 2. in Matth. vel denique ignem tribulationis in hac vita, qui nulli baptizato deest, ut exponit auctor operis imperfecti in cap. 3. Matth.

Kemnitius in hunc canonem nihil aliud notat, nisi non esse necessarium, ut aqua exorзizetur, & benedicatur: si aqua vera, & naturalis sufficit. Sed male id colligit: nam etiamsi ad substantiam sacramenti non requiratur benedictio aquæ, tamen recte est instituta, ut infra dicemus.

CAPVT TERTIVM.

De forma Baptismi.

FORMAM Baptismi et si hoc tempore ferè omnes admittant, quod ad præxim attinet, quæ est singularis Dei prouidentia, ne innumerabiles infantes pereant, tamen fuerunt, & sunt non leues de hac re errores. PRIMVS fuit quorundam, qui ipso tempore apostolorum baptizabant in nomine trium principio carentium, id est, trium Patrum, vel in nomine trium filiorum, aut trium Paracletorum. Qui error refertur, & damnatur can. 48. alias 49. Apostolorum.

SECUNDVS fuit Gnosticorum, qui teste Irene lib. I. cap. 18. baptizabant in nomine Ignoti Patris, in veritate Matris omnium, & in nomine descendantis IESV.

TERTIVS fuit Cataphrygum, & Paulianistarum, qui non baptizabant in nomine Patris, & Filii, & Spiritus sancti, ut Innocentius I. testatur in epist. 22. cap. 5. & ideo iterum baptizari iubentur in Concilio Nicæno, canone 19. & Laodicensi, can. 8.

QUARTVS fuit aliquorum Arianorum, qui baptizabant in nomine Patris per Filium in Spiritu sancto. Refert Nicephorus lib. 13. cap. 35. ita baptizare voluisse quendam Episcopum Arianum nomine Deuterium; sed diuino miraculo continuò aquam euanuississe. Alios item Arianos non seruasse veram Baptismi formam patet ex Concilio I. Arclatensi, ubi can. 8. iubentur interrogari Ariani, cum ad Ecclesiam redeunt, sub qua forma verborum à suis baptizati sint: non enim eodem modo

10 Cap. III. De Sacramento Baptismi. Lib. I.

modo omnes baptizabant. Multi quoque eorum Catholicos rebaptizabant, ut Augustinus testatur libro de hærel. cap. 43.

Q VINTVS error fuit quorundam Eunomianorum, qui non baptizabant in nomine trium personarum, sed in Domini mortem, ut refert Socrates lib. 5. cap. 23.

SEXTVS fuit Græcorum, qui aliquando ita adhærebat suæ formæ, qua dicunt, Baptizetur N. seruus Christi, in nomine Patris, & Filii, & Spiritus sancti, ut rebaptizare audentem Latinos baptizatos, illis verbis; Ego te baptizo, &c. Refert, & damnat hunc errorem Concilium Lateranense sub Innocentio III. cap. 4. vbi non damnatur forma baptizandi Græcorum, quæ non differt à nostra, quoad substantiam, ut in Concilio Florentino sess. vlt. declaratum est, sed damnatur Græcorum error, qui nostram formam damnare audebant sine ratione, vel causa.

SEPTIMVS errore est Lutheri, Zwinglii, & Brentii, quicunque forma visitata vtendum esse doceant; tamen id non putant necessarium ad Baptismi substantiam. Lutherus in lib. de captiu. Babyl. cap. de Baptismo, affirmat Baptismum esse ratum, quibuscumque verbis collatum, modò non in nomine hominis, sed in nomine Domini detur. Immò addit, etiam si impius minister non det in nomine Domini, ramen esse ratum, si suscipiatur in nomine Domini. Zwinglius in lib. de vera, & falsa religione, cap. de Baptismo sub finem, aperte docet, non esse necessarium ullam certam verborum formam in Baptismo, licet dicat se non vetare, quo minus vtamus sacris verbis iam receptis. Vnde Zwingiani quidam, ut refert Ioannes Eckius homil. 10. de Baptismo, baptizabant in nominibus Patris, & Filii, & Spiritus sancti; qui est manifestus Arianismus. Nomen enim, potestatem, & auctoritatem significat in Scriptura, Marc. vlt. In nomine meo Dæmonia euident. Ioan. 5. Ego vero in nomine Patris mei. Ut autem est vna Deitas trium personarum, ita vnum nomen, vna virtus, vna auctoritas. Vnde Ambrosius lib. 2. de Sacramentis, cap. 7. & Hieronymus in cap. 4. ad Ephes, notant in Baptismo triam fieri mersionem, & tamen non dici, In nominibus, sed in nomine Patris, & Filii, & Spiritus sancti. Ioannes Brentius in suo Catechismo, cap. de Baptismo scribit, verum esse Baptismum, si minister post recipiendum à Catechumeno Symbolum fidei, ita diceret: Audiri

1000

iam ex te confessionem fidei tuæ, quod credas in Deum Patrem, Filium, & Spiritum sanctum: in hanc igitur confessionem intingo te in aquam, ut hoc signaculo certus sis te esse insertum Christo; vade in pace. Monet tamen, ut forma Ecclesiæ visitata seruetur. Quod quidem benè monuit, alioqui non esset ratus Baptismus.

Præter hos errores est opinio quædam incommoda multorum Catholicorum, qui putarunt sufficere ad Baptismum, invocationē vnius personæ diuinæ tantum, ac præsertim Christi. Ita videntur sentire S. Ambrosius libro i. de Spiritu sancto, cap. 3. Beda in cap. 10. Auctor qui ipsa verba Ambrosij citat. Bernardus epist. 340. ad Henicum, qui docet, ratum sibi vivi-deri Baptismum, quem quidam contulit ex imperitia, In nomine Dei, ac sanctæ & veræ crucis. Item Hugo de S. Victore, lib. 2. de Sacramentis, parte 6. cap. 2. & Magister lib. 4. sentet. dist. 3. & denique Nicolaus Papa in epist. ad Bulgaros, ut habetur can. A quodā Iudeo, de consecrat. dist. 4. qui nihil quidem definit, sed profert Ambrosij auctoritatem, & eam approbare videtur.

Fundamenta horum auctorum sunt duo. PRIMVM, au-
toritas Apostolorum, qui baptizabant in nomine Christi, ut
habetur Auctor. 8. & 10. & 19. SECUNDVM, quia in qualibet
persona diuina implicitè continentur omnes tres. Qui enim
dicit Patrem, simul dicit Filium, & Spiritum oris eius; qui di-
cit Christum, dicit yngentem, id est, Patrem, yncum, id est,
Filium, & yunctionem, id est, Spiritum sanctum; qui dicit Spi-
ritum sanctum, dicit patrem, & Filium, à quibus ille spiratur.
Sed fundamentum præcipuum omnium auctorum post Am-
brosum, est ipsius Ambrosij auctoritas; quare si forte Ambro-
sius non illud voluerit dicere, quod verba eius sonare viden-
tur, ruit fundamentum præcipuum illius opinionis.

Sed quidquid de hoc sit, certum est, Baptismum, aut abso-
lutè, aut sub conditione repetendum, si detur in nomine Chri-
sti, aut alterius cuiusvis personæ, sine expressione aliarum, ut
tectè docent Theologi omnes grauiores in 4. dist. 3.

Est igitur hæc vera forma Baptismi: *Ego te baptizo in no-
mine Patris, & Filii, & Spiritus sancti. Vbi non est de es-
senti, illa particula, Ego, & licet ea non debeat omitti cùm præ-
scribatur ab Ecclesia, tamen si omitteretur, Baptismus inte-*

ger,

ger esset, quia satis exprimitur persona ministri in verbo, *Baptiz*

Porrò hanc esse veram & necessariam formam Baptismi colligitur ex Euangelio, sed non evidenter ex solo Euangelio, sed cogimur recurrere ad traditionem, & Ecclesiæ declarationem. Quod est NOTANDVM contra Caluinum, & alios hereticos, qui eandem formam præscribunt in rito Baptismi, & eadem vntuntur, cum tamen nolint traditiones, sed solam scripturam admittere. In Euangelio nihil habemus nisi vnum testimoniun, Matth. 28. *Euntes, docete omnes Gentes, baptizantes eos in nomine Patris, et Filii, et Spiritus sancti.* Ex quibus verbis, si sola considerentur, non cogimur dicere, Ego te baptizo, sicut non cogimur dicere cum prædicamus, Ego vos doceo; sed videmur satisfacere, si baptizemus, & docemus, etiam si non exprimamus verbis nos id facere. Parte ratione non colligitur evidenter ex hoc solo loco, oportere dicer, In nomine Patris, & Filii, & Spiritus sancti: posset enim exp*n* ihic locus, vel de fide Trinitatis, ut baptizemus in fide Trinitatis; vel etiā de auctoritate, id est, ut baptizemus auctoritate à Deo accepta; quemadmodum cum Marc. vlt. legimus: *In nomine meo da monia eiunt, et c.* Sitamen adiungamus ad hunc locum Euangeli, Ecclesiæ auctoritatem, constabit certissime, omnia illa verba ad formam Baptismi pertinere.

Nam IN PRIMIS esse dicendum: Ego baptizo, vel aliquid eiusmodi, quo exprimatur actio ministri; docet Concilium Flotentium in instructione Armenorum: docet etiam Alexander Papæ III. extra de Baptismo, & eius effectu, cap. Si quis puerum: docent omnes Catechismi, & rituales libri, etiam antiquissimi. Denique etiam ratio id docet. Nam sola illa verba: *In nomine Patris, et Filii, et Spiritus sancti*, etiam cum ipsa lotione externa, non determinatè significant id, quod hoc Sacramento significari debet. Nam posset fieri lotio illa ad restigerandum, aut curandum ab aliquo morbo, & ad id etiam recte inuocaretur auxilium sanctæ Trinitatis. Itaque addendum est verbum, *Baptizo*, quo ex yisu Ecclesiastico significatur ablutio a sordibus non tam carnis, quam spiritus.

DEINDE esse exprimendam aliam personam à ministro diuersam; quod facimus per pronomen (*Te*) ac proinde non posse ullum baptizare seipsum; docet præter testimonia iam allata, disertis verbis Innocentius III extra de Baptismo, & eius effectu, cap. Debitum,

DENI

D E N I Q U E esse exprimendas tres diuinias personas; p̄ter allata testimonia, docent duo summi Pontifices, Pelagius can. Sic & can. Multi sunt, & Zacharias can. In Synodo, de consecrat. dist. 4 qui affirmant, Baptismum non esse ratum, si detur in nomine Domini, aut in nomine Christi, nisi diserte exprimantur tres personæ. Idem confirmat traditio omnium Patrum, qui affirmant, Baptismum dari debere in nomine Patris, & Filii, & Spiritus sancti. Vide can. 49. Apostolorum. Dionysium de Eccles. hierar. cap. 2 Iustinum in Apologia 24 Originem in cap. 6. ad Rom. in illud: *Quicunq; in Christi baptizati sumus.* Vbi etiam dicit, non haberi ratum Baptismum in nomine solius Christi, nisi addantur aliae personæ. Item Athanasium serm. 3. contra Arianos, parùm à medio: vbi dicit, non esse perfectam initiationem, nisi in nomine trium personarū; quod idem habent Basilius lib. de Spiritu sancto, cap. 12. & Didymus lib. 2. de Spiritu sancto, non procul ab initio. Vide etiam Nyssenum in lib. de Baptismo ante medium. Chrysostomum in cap. 5. ad Ephes. in illud: *Mundans eam lauacro.* Nazianzenum oratione in sanctum lauacrum prope finem. Damascenum lib. 4. cap. 10. & Theophylactum in cap. vlt. Matth. Præterea ex Latinis Tertullianum lib. contra Praetextam, & lib. de corona militis. Cyprianum in epist. ad Iubaianum. Hilarium libro de Synodis in fine. Ambrosium lib. 2. de Sacramentis, cap. 5. & 7. de iis, qui initiantur mysteriis, cap. 4. Hieronymum in cap. 4. ad Ephes. Siricum in epist. 1. Innocentium epist. 22. Augustinum lib. 6. de Baptismo, cap. 25. Leonom in epist. 4. Fulgentium de incarnatione, & gratia Christi, cap. 11. Gregorium lib. 9. epist. 61.

Neque illa argumenta quæ posuimus pro eorum opinione, qui putabant Baptismum esse ratū, si in nomine solius Christi daretur, aliquid concludunt Ad PRIMVM de exemplo Apostolorum, aliqui Scholasticorum respondent, Apostolos id fecisse ex quadam peculiari Dei dispensatione. Sed, cūm neq; in Scriptura, neq; in vlo Concilio, neq; in Patribus legatur talis dispensatio, solidius respōdent, qui negant Apostolos baptizare, nisi in nomine Patris, & Filii, & Spiritus sancti, id quod etiā confirmatur ex ca. 19. Act. Nam cūm quidam paulo dixissent: *Neque si Spiritus sanctus est, audiūimus;* subiunxit Paulus: *In quo ergo baptizati es tu? Quibus verbis indicat etiam suo tem-*

pera

14 Cap. III. De Sacramento Baptismi. Lib. I.

pore in ipsa forma Baptismi nominari solitum Spiritum sanctum. Et cum certum sit, nunquam datum esse in nomine solo Spiritus sancti, sequitur ut datus sit in nomine trium personarum. **ADDE**, quod cum in Canonibus Apostolorum damnentur, qui aliter baptizant, quam in nomine Patris, & Filii, & Spiritus sancti, & antiquissimi Patres, qui vel Apostolos considerunt, vel eorum discipulos, ut Dionysius, & Iustinus, eandem formam Baptismi prescribant, non est ylo modo credibile, Apostolos aliter baptizasse.

Quod autem Lucas dicit in Actis, cap. 2. 8. 10. & 19. baptizasse Apostolos, in nomine Domini Iesu: potest intelligi multis modis, nimirum, ut baptizasse dicantur in fide Domini eti, vel auctoritate Domini Iesu, vel Baptismo a Christo instituto, vel denique in nomine Domini Iesu, sed non solius, verum adiuncto Patre, & Spiritu sancto. Fortasse enim admissum commendandum nomen Christi, ita dicebant, Ego te baptizo in nomine Patris, & Filii eius Iesu Christi, & Spiritus sancti.

Et hoc modo videntur mihi intellexisse haec loca, Hilarius, Basilius, & Fulgentius. Nam Hilarius in libro de Synodis prope finem, enumerat varia loca Scripturae, quae videntur inter se pugnare, nisi recte intelligantur: & inter alia ponit haec loca, quod Apostoli Matth. v. 19. iussi sint baptizare, in nomine Patris, & Filii, & Spiritus sancti, & tamen in Actis Apostolorum referantur baptizasse in nomine Christi. Et quamuis non explicit Hilarius quomodo haec intelligenda sint, tamen ex modo loquendi ipsius, & ex aliis similibus locis in speciem pugnantibus, colligitur eum sensisse Apostolos baptizasse in nomine Patris, & Filii, & Spiritus sancti: alioqui, ut ipse dicit, in crimine fuissent, tanquam pruaricatores regulæ divinæ sibi datae; sed Lucam in Actis id ipsum breuissime significasse, exprimendo nomen Christi, & non negando nomina alterum personarum. Fulgentius de incarnatione, & gratia Christi, cap. 11. apertissime dicit, Apostolos baptizasse, in nomine Patris, & Filii, & Spiritus sancti, & hoc ipsum esse baptizare in nomine Domini Iesu, ut dicitur Act. 2. vel in morte Christi, ut dicitur Rom. 6. Basilius in lib. de Spiritu sancto, cap. 12. scribit in nomine Filii, intelligi omnes personas, cum Scriptura dicit, Apostolos baptizasse in nomine Christi: proinde Apollo-

Apostolos reuera in nomine Patris, & Filij, & Spiritus Sancti baptizasse, non in nomine solius Christi. Vbi vult S. Basilius in una persona intelligi omnes, quod attinet ad verba S. Lucæ in Actis, non autem quod attrinet ad ipsam formam Baptismi. Et hoc etiam modo aliqui volunt loquutu esse Ambrosium, & ex eo Bedam. Nam Ambrosius videtur sequi Basilium, cum eadem testimonia adducat, & de eadē re loquatur, & frequenter soleat Basilij sententias suas facere: certè Catechismus Romanus cap. de Baptismo, coniungit in hac re Ambrosium cum Basilio.

Ad SECUNDUM argumentum respondeo, non sufficere in Baptismo implicitam mentionem trium personarum, tum quia Dominus in Euangeliō, & omnes Patres explicitam tradunt, tum etiam quia sacramenta sunt signa externa, & sensibilia; proinde oportet invocationem trium personarum exterius, & sensibiliter sonare, nec sufficit, si unius personæ invocatio exterius sonet, aliarum autem sola mente concipiatur, quod sit, quando implicitè solum invocantur.

CAPUT QVARTVM.

De necessitate & institutione Baptismi.

DIXIMVS de caussa materiali & formalis, nunc de necessitate dicendum, quæ ad caussam finalem pertinere videtur. Ac primum nulla quæstio est, quin Baptismus sit necessarius ad salutem ex divino Christi mandato. Id enim etiam Calvinus fatetur in Antidoto Concilij, less. 7. can. 5. Sed controversia est, an sit necessarius, ut medium ad salutem, ita ut si quis non baptizetur, pereat, etiam si forte ob ignorantiam excusat à prævaricatione præcepti. Ac præcipue habet locum controversia in parvulis, qui non sunt capaces præcepti. Tres autem sunt quæstiones: PRIMA, an Baptismus sit necessarius. SECUNDA, quando cooperit esse necessarius. TERTIA, an possit suppleri per martyrium, aut pœnitentiam, quæ dicuntur Baptismata, illud sanguinis, hoc flaminis.

De PRIMA quæstione fuit olim hæresis Pelagianorum, Baptismum non esse necessarium ad remissionem peccati originalis;